

hostibus nefas existimarunt: ita nostri non sibi legitime militare licere opinati sunt, priusquam hac ceremonia legitimæ militiæ consecrarentur, qua Guil. Rufum Angliæ Regem à Lanfranco Archiepiscopo Militem factum legimus. Sed hæc consuetudo paulatim in desuetudinem abiit, ex quo Normanni, ut habet Ingulphus, irriserint & exploserint, ac Synodo habita Westmonasterii anno 1102, sanctum fuerit *Ne Abbates faciant Milites*: *Quod nonnulli tamen exponent;* *Ne Ecclesiæ prædia militari feudo tenenda Abbes concederent.*

Postea ad Principes vicinos Reges filios mittere solebant ut equestrem ab illis dignitatem acciperent: sic Henricus noster secundus missus ad Davidem Regem Scotorum, & Malcolmus Rex Scotorum ad Henricum nostrum secundum, & Edwardus noster primus ad Regem Castillæ, ut acciperent ab iis *Arma militaria*, sive *virilia*, his enim loquendi formulis pro creatione Equitis eo seculo usi sunt. Tunc etiam ad ornamentum præter gladium, & cingulum, calcaria aurata etiam acceperunt, unde *Milites & Equites aurati* hodie vocantur. Ius etiam sigilli additum, antequam enim baltheo militari cincti erant, ut colligo ex Abendonensi libro, sigillo uti non licuerat. *Quod descriptum* (inquit) Richardus Comes Cestrensis sigillo matris Ermentrudis signare constituit, cum (nondum enim militari baltheo cinctus erat) literæ qualibet ab eo directæ materno sigillo includebantur. Subsequenti ætate ex censu (ut colligitur) facti fuerunt Milites, qui enim feodium magnum militare, id est, (si antiquis schedis sit ulla fides) * 680 acres terræ habebant, ordinis militaris ornamenta suo quasi jure postularunt. Imo sub Henrico tertio quodammodo coacti fuerunt Milites fieri quotquot libras quindecim ex annuis terrarum redditibus collegerunt. ut jam titulus potius oneris, quam honoris videretur. Anno 1256, exiit edictum regium, præceptumque est, & acclamatum per totum regnum, ut qui haberet * xv libratæ terre, & supra, armis redimitus tyrocinio donaretur, ut Anglia sicut Italia militia roboretur: & qui nollent, vel qui non possent honorem status Militaris sustinere, pecunia se redimerent. Vnde in Archivis regni toties occurrit. Pro respectu Militie Ade N. I. H. &c. & hujusmodi præsentationes à Iuratoribus. R. de Sancto Laurentio tenet integrum feodium, & est plenæ etatis, & nondum factus Miles, ideo in misericordia. Huc usque & ulterius nisi mea falilit observatio, in formulis Iuris nostri ubi duodecim-viri sive juratores nominantur apud quos facti fit probatio, illi milites dicti erant, quibus erat feodium integrum, illique Milites gladio cincti, qui à Rege baltheo cincti militari. Quo tempore cum Rex milites crearet, ut habet idem Matthæus Paris, ueste deaurata ex pretiosissimo baudekino & coronula aurea redimitus gloriose in solio sedet, singulisque militibus 100 Solidos pro harnesiamentis prestiti. Nec solum Rex, verum etiam Comites eo seculo crearunt Milites. Meminit enim idem author quomodo Comes Glocestriæ Wilhelmu fratrem suum proclamato Torneamento, & Simon de Montforti Comes Leicestriae Gilbertum de Clara baltheo cinxit militari. Ut in Gallia, quod ex formula literarum nobilitationis constat, qui nobilitatis ejusmodi literas obtinuit, à quocun-

que milite voluerit, valeat militiæ cingulo decorari. Verum jam inde nemo creatus fuit apud nos Miles nisi vel ab ipso Rege, vel Regis primo genito, accepta prius à patre authoritate, vel à Regis Locum-tenente sive præfecto in exercitu, idque vel ob res fortiter gestas vel gerendas, aut togatam prudentiam. Et hoc sane à Regibus nostris prudentissime institutum cum feuda jam non sibi essent quæ donarent. Nihil sane valentius ad excitandos viros strenuos, atque astringendos sibi optimos beneque meritos qui claro loco nati, & à re instruēti, quam illos hoc titulo Militum honorario (qui ante honoratæ tantum functionis nomen erat) benigne & benevole exornare. Qui cum à Principe consulto, meritoque deferebatur, ampli sane præmii, beneficiique loco, & inter insignia honoris habebatur. In hoc enim virtutis mercedem, familia laudem, generis memoriam, & nominis gloriam collocatam qui sic Milites facti existimarunt. Adeo ut juris nostri consulti scripserint, quod Miles sit nomen dignitatis, non item Baro. Olim enim Baro, si non ex hoc ordine esset Equestri, simpliciter suo prænomine & nomine sine aliquo adjuncto, nisi Domini (quod etiam Militibus competit) scribebatur. Miles autem nomen honorarium videatur adjunctum, cum Reges, Dukes, Marchiones, Comites, & Barones dignitatem una cum nomine expetierint. Iuvat hic interserere quæ de creatione Militum tempore Edwardi primi scripsit Matthæus Florilegus. Ad augmentandam profectiōnem suam in Scotiam fecit Rex per Angliam publice proclamari, ut quotquot tenerentur fieri Milites successione paterna, & qui haberent unde militarent, adessent apud Westmonasterium in festo Pentecostes, admissuri singuli omnem ornatum militarem, præter equitaturam, de regia Garderoba. Confluentibus itaque trecentis juvenibus filiis Comitum, Baronum, & Militum, distribuebantur purpura, byssina sindones, cyclades auro textæ affluentissime, prout cuique competebat. Et quia Palatium regale, et si amplum, tamen ad tot occurrentium turbam angustum fuit, apud novum Templum Londini succisis lignis pomiferis, prostratis muris, exerunt papiliones, & tentoria, in quibus tyrones deauratis uestibus sive singuli decorarent; ipsa quoque nocte in Templo prædicti tyrones, quotquot poterat capere locus ille suas vigilias faciebant. Sed princeps Wallie, præcepto regis patris sui, cum præcelsis tyronibus fecit vigilias suas in Ecclesia Westmonasterii. Ibi autem tantus clangor tubarum, & tibiaeinum, & exaltatio vocum præ gaudio extiterat clamantium, quod conventus de choro ad chorū non audiretur jubilatio. Die autem crastina cinxit rex filium suum baltheo militari in palatio suo, & dedit ei Ducatum Aquitanie. Princeps ergo factus Miles perrexit in Ecclesiam Westmonasterii ut consocios suos militari gloria pariter venustaret. Porro tanta erat ibi præsura gentium ante magnum altare, quod duo Milites morerentur, quam plures syncoparent, etiam cum quilibet ad minus tres milites ad se ducendum & tuendum haberet. Princeps autem propter turbam comprimentem, non secus, sed super magnum altare divisa turba per dextrarios bellicosos, socios suos cinxit. Nostris vero temporibus qui Militarem dignitatem suscipit, flexis genibus, educito gladio leviter in humero à principe percutitur, qui his verbis Gallice affatur: *Sois Chevalier au nom de Dieu*, id est, *Sis eques in nomine Dei*. & postea addit, *Avancez Chevalier*, id est *Surge eques*

* 800 a.d.

Historia minor
Matthæi Paris.
* *Integrum*
feodium
Militis.